



**Uunga siunnersuut: Ilinniarnertuunngorniartarneq pillugu Inatsisartut inatsisaata allanngortinnera pillugu Inatsisartut inatsisaat nr. xx, xx. xxx 2020-meersoq.**

(Ilinniartitaanermut, Kultureqarnermut Ilageeqarnermullu Naalakkersuisoq)  
(Siullermeerneqarnera)

Demokraatinut pingaaruteqarpoq, qulakkeertuaannassagipput, ilinniartitaanitta sapinngisamik qaffasinnerpaaffianiitittuarnissaa. Iluaqutaanngilaq, oqaannaraluaraanni – tamanna aamma piviusumi atuuttariaqarpoq.

Isertugaataanngilaq, inuusuttut sulii ikippallaat, ilinniagaqalersarnerat. Ilorraap tungaanut ingerlavoq, kisiannili amerlanerit peqataatittariaqarpagut. Taamaattumik pissusissamisoorpoq qimerluussallugu, ullumikkut iliuuseqartarnitsinnit, allaanerusumik iliuuseqarsinnaanersugut.

Tamanna tunngavigalugu Demokraatit una siunnersuut tigulluarpaat. Pingaartuuvoq Nunatsinni sulisinnaasut ilinniagaqarnermut- piginnaanngorsaqqinnermullu qaffassarnissaat, suliniutit tamarmik, tassunga tikkuussisut Demokraatinit tapersorsorneqartuassapput.

Siullertut Demokraatit iluarisimaarpaat, ilinniarnertuunngorniarnermut qinnuteqartitsineq allanngortinniarneqarmat, pisariinninngorlugu paasiuminarninngorlugulu. Tamanna ilinniarfimmut, piffissamik sipaarutaallunilu aamma aningaasanik sipaarutaasinnaasoq, minnerunngitsumillu ilinniartunut iluaqutaassaaq. Nammakkumminaassaaq, qinnuteqartitseriaatsip paasiuminaatsup kingunerisimassappagu, arlallit, tamanna pissutigalugu ilinniarnertuunngorniarniluni ilinniarnissamut akuerisaanngitsoorsimappata. Tamanna tunngavigalugu pitsaasorujussuuvoq periutsip eqaallisarneqarnissaa.

Alla pingaarutilittut erseqqissarniagara unaavoq, siunnersuutip sinaakkutit ima allanngortissammagit, ilinniarneertuunngorniarniluni ilinniarneq ukiuni pingasuni sivisussuseqartariaqanngitsoq, kisiannili sivisunerisinnaasoq sivikinnerisinnaasorluunniit. Kingunerissavaa, ilinniartunut eqimattanut assigiinngitsunut ilinniakkanik tulluussaanaasaaq pitsaanerulissasoq, taamaaliornikkullu pitsaanerisunik periarfissiisinnalissalluta, ilinniartut amerlanerusut ilinniarnertuunngorniarnermik naammassitinnissaanut.

Paasivaralu, siunnersuummut tusarniaanermut akissutit iluarisimaarinnittuusut, tusarniaanermullu akissutit ilaasa kingunerisimagaat inatsisissatut siunnersuutit allanngortiterneranut, pitsanngorsaataasunik.

Tamaat isigalugu Demokraatit siunnersuut pitsaasutut isigaat, neriuppugullu, inuusuttut amerlanerit ilinniarneertuunngornerannik kinguneqarsinnaasoq.

Taamatut oqaaseqarluta siunnersuut isumaqatigaarput Ilinniartitaanermut, Kultureqarnermut Ilageeqarnermullu ataatsimiititaliamut suliareqqitassanngorlugulu.